

四庫全書

集部

欽定四庫全書

石倉歷代詩選卷三百四十

明 曹學佺 編

明詩初集六十

羅紘

字孟維
山陰人

讀馬援傳

富貴人所重貧賤世所輕
重輕何足較立身期垂名
小器恒自足大材當晚成
君看馬伏波激烈真豪英
方在

童子日藻鑑有賢兄請從邊田牧屈志事躬耕牛羊徧
阡陌穀粟實豐盈一朝散親舊拂衣事遐征寧為守錢
虜不忝國士稱東進謁明主論議推忠誠岸憤感知已
聚米知地形用兵何神速破敵如流星垂老志益壯據
鞍猶請行至今千載下竹帛垂光榮丈夫重節槩遇時
當効能誰能老閭里齷齪終其生

竹軒

結構臨芳甸綠竹茂前墀鸞枝忽蔥蒨鳳尾何葳蕤晨

遊裏清潤夕憩濯涼颺蟻酒時獨酌羽扇不須持動息
絕紛擾耳目無纖翳願守歲寒約載歌淇澳詩

夢母

昨夜夢還家登堂見慈母依依別後情款款生前語覺
來不復寐敲枕愁如縷靜聽北窗間瀟瀟響寒雨

題畫

入山采靈藥山深愁日短空林獨自行木客時為伴木
肥晨露滋芝潤春泥暖荷鑷暮歸遲前溪白雲滿

賦得醫無閭山送王娛清之遼東省兄

吾聞醫無閭山天下奇插空秀色青崔嵬上有高標萬丈不可以攀陟下有飛泉百尺砮厓轉石相喧逐平生有志覽形勝日夕夢想空徘徊羨君昂藏七尺軀論談豁達心胸開詩書百氏盡蒐獵文辭落筆驅風雷入門下馬告我往斯境愧我碌碌空塵埃便須搥牛撾鼓餞君別安得美酒三千杯酒以沃離思詩以壯行色奉觴為君壽高歌振金石君家伯氏人中龍祇今久作遼城

客長沙遷逐淹賈生江海流離老亭伯因君顧同氣余
亦懷連枝有兄在金臺別來知幾時高齋聽雨念疇昔
客居對月成遐思前日寄書來詢余故鄉事親老更家
貧茫然但增愧因君此行重感激丈夫別離何足惜弟
兄相見意綢繆夜雨連牀話胸臆問余別況今何如塞
土故園空四壁簞瓢以忘憂琴樽聊自適每懷放浪山
水間有足欲行嗟未得君不見醫無閭山天下奇為我
殷勤訪靈蹟

汴柳搖金圖

隋皇御極輕九有金壁犀珠積盈畝開渠亘汴千里餘
却向是堤種花柳長堤柳樹搖春風牙檣錦纜舟如龍
明眸皓齒侍君側歌聲遏雲歡未終王氣漸消陵谷改
昔日繁華竟何在空餘故柳滿堤邊葉葉含顰似相待
堤柳含顰映碧流遊人日日駐蘭舟畫圖一見猶增感
況是曾經此地遊

附羅周

字汝濟有礪
軒集結之子

春朝榮遇為梁方伯賦

曉漏徹金門千官肅駿奔龍蛇斡影動貔虎仗儀屯香
霧籠仙珮紅雲擁帝閣朝參方岳重垂拱聖人尊班接
鵷鴻侶榮沾雨露恩燕當青瑣闥光照紫薇垣翠釜來
芳饌瓊漿注上樽官袍頒獸錦鼎食賜熊蹯臣職思無
忝天顏喜自溫歡聲騰海宇和氣藹乾坤霄露殊優渥
皇猷待討論願留周召伯長爾鎮雄藩

吟舫為陳太常賦

來往寄煙波其如逸興何靜依汀蓼泊閒拂渚蘋過汎
汎同江葦亭亭隱浦荷醉來忘繫纜遊處勝鳴珂榜石
登吳嶠觀潮度淞河蟲魚勞細詠鷗鳥避狂歌稍畏漁
郎雜寧愁尹節呵才矜揚鳳吐穗勝灞驢馳筆幻煙霞
態腸抽錦繡窠却緣佳句惱酹酒謝詩魔

寓懷

為山在終蕢鑿井須及泉弱齡昧所適中道遂棄捐窮
廬恥衰朽肝腸日憂煎我思古達人亦以文辭宣不聽

南山歌誰知甯戚賢

又

有兔正爰爰雉乃罹于羅福善與禍淫此理今則那醇
風日澆漓笑談生矛戈陸行畏巉巖水往多風波兀坐
若無覺秋風振庭柯

題鷹

飢鷹困絛紲斂翮自卑栖匪無搏擊能所愧奮迅遲喈
彼藩間雀無為遽見欺秋風有時至萬里逞雄姿

又

胡鷹錦為羽利爪雄武臣健翮剪荆棘逸氣凌秋旻擊
物時未遂卑栖恥依人誰當解羈繫為空狐兔羣

荔枝山鳥

雨過蠻溪斂瘴煙猩紅萬朵壓枝鮮誰知山鳥偷銜去
又是紅塵一騎前

羅頤

字儀甫
絃之孫

上之回

上之回撫西域開玉門綏九陌莎車請吏大宛送質匈奴稽首烏孫屈膝百蠻同四海謐天馬來赤雁獲朱草生嘉禾茁盛哉崇丕基神威震六合寶鼎見醴泉開封疆闢土宇恢邁禹蹟越堯規大漢洪烈孰與齊

艾而張

艾而張羅鷹鷂罔過但我欲置雲間鴻奈爾羣雀啾啾何鴻之飛極天池掩浮雲燉罔施疇能頓天網恢地網鴻飛冥冥逝將往

思悲翁

思悲翁在彼西山我心惓惓謂我瘋憂孰可終楸梧鬱鬱
松柏依依翁歸曷之所莫知鳳鳥不至梟于飛听不旦
出目無輝已焉哉陸行舟水行車復何歸禍夫騰驤雅
人微

巫山高

巫山高猶可陟江之永限南國我欲西遊誰為汎舟我
陸無輿我行安休翩翩悠悠鬱鬱陽臺靄靄朝雲有所

思思美人美人不可見猿猱今為羣猿猱隱爾形鳴聲
還獨聞黯山谷慘晨昏泣予淚盈衣巾嗟彼嗷嗷愁殺
人

夏人歌二章

池鴈涸兮邦其覆叶兮我王樂兮何不度兮歸彼亳兮
毋助虐兮

樂兮嬉兮夏道微兮我安歸兮我車驅兮我馬馳兮去
彼危叶兮何不宜兮

黃澤謠二章

黃之澤駱馬沃若我思王度

黃之陂駱馬駢駢思我國謀

叶

朱鷺

朱鷺毋逝梁毋食我莢中
鰾鰾曷不仁魚鼈罔馴我
繒斯施魚鼈咸若川澤夷

上陵

上陵魏哉中有窟楚柎生
堂枝鬱鬱野有喬松斧奚從

亦鳥飛逝不來叶 鵲巢晝鳴我心悲

芳樹

芳樹曷以花自賊樹何貴貴有質桂之香靡嘉實桃以
妍根則蝕柳以枝攀桑以葉不如松與柏亭亭自孤直
物性固不同芳菲諒何益

送下洋客

積水連檣杳煙濤絕域均星杓插天漢日月轉波輪地
坼炎洲迥山橫昧谷鄰岩巖半夜曉海樹隔年春玳瑁

沙籠蜃珊瑚窟聚蟪風帆搖鬣嬾霜杵響蛟人五色翻
鯨浪三花度鶴津鄉心看斗近旅夢怯潮頻燈遠明南
極舟移按北辰刀書藩俗古行說上皇民

野田黃雀行

十畝之間雀啾啾止蒿集萊鳴相酬遠川遙陌路孔修
原田茫茫禾黍稠秋來古樹風颼颼夕陽慘淡沈西丘
羣飛羣下不相求銜穗食穀安無憂南有樛木在芳洲
雌雄迫暮共依投咄哉茲禽多詭謀性行佻巧誰與儔

穿屋作巢于高樓食彼粱盛令人愁非羅非丸致無由
草竊奸宄將何尤吁嗟此烏母久留願汝化蛤湮東流

從軍行

仗劍朝出門含淒辭六親鄰曲置美酒祖送前谿濱酒
酣衆樂作慰我行從軍征役諒不遙豈限越與秦

其二

悠悠邁長途迢迢涉寒澗故里看漸遙春日未云晏昨
發西陵陸今宿富春阪捐軀赴國憂負戈何所歎

其三

縣官遣部吏送我之戍營去家隔旬月憂歡兩相縈什
伍共牽率候晨發修程春早天尚寒山木鮮敷榮

其四

日旰陟高山山高鳥不飛徒步愁力弱策馬畏險巖猱
狖隨我行豺虎怒我啼輕身先儔侶勇往多捷馳

其五

採芑畱田中伐荆溪麓邊侵晨已啟行日夕猶未安霜

露濕裳服塵瘴污旌旃部伍各勞悴飲食尚或愆嗟嗟
戎行士草草負戈鋌

其六

山行窮深林林深人跡稀五里一荒村十里無礮谿路
逢飢老翁投杖向我啼宣言盜賊暴民庶久流離我惜
為徒卒對之空傷悲

其七

清晨秣吾馬整駕至行營主將猶不識寧聞衆校名荷

予命徒侶將赴青田征軍行極勞悴山勢轉崢嶸辛苦
何所道男兒貴垂名

其八

賊盜布山岡往來森若麻捐生寇我壘咆哮肆爪牙儔
侶委壑死將軍竄水涯匹身禦勅敵奮首揮鎔雖獲
戎猛歸援甲自悲嗟

其九

隆冬登高山曠望極閩吳昔來桃李花今已雪載塗慄

慨思故園行列相喧呼我行豈徒旋覽轡復南徂當清
巨海隅一使斯民蘇

其十

建旄徂甌野整陣嚴三軍開榛創戎壘斬木守要津賊
來相格戰志已無東閩可惜將校愚退止問道濱未戰
先土潰坐使黎庶湮

其十一

冒暑行山阿日赫草木焦溪獸苦炎熱獨行向我號南

望建嶺巔鬼鬼一何高
暖熾白日融岡阜日不毛
持謝邦族間遠役無乃勞

其十二

獨行越荒溪屍積溪流丹
四郊何蕭條慘戚秋日寒
回顧望修途淒風集高巒
掩淚自流涕哀鬱傷朱顏
悲哉城南詩古今同所歎

其十三

軍動自無律刑殺雜偽真
濫誅及黔黎戡夷被齊民
日

晚入山隅有客泣水濱
哀哀一何苦
昂首訴蒼旻
泣盡赴修川
甘之澗溪瀕

其十四

自我徂南征
戰伐三載餘
離家顧已久
情思鬱不舒
昨日收甌酋
北歸欣有期
膏車戒行途
駕言發軍壘
暮猶青田宿
朝已麗水辭

其十五

里中遇故人
相與語疇昔
歸家門戶靜
階除少行跡
蚯蚓

蚓穴砌間蟠蛸網四壁撫事多踟躕不知時節易上堂
拜雙親入室長太息

遊仙詩

蟠木倚滄溟花開隱耀靈高臨四海碧下視九州青地
遠無風雨天低動日星不須乘鶴去三島亦浮萍

其二

幽徑赤城顛松蘿九曲連千林喧藥杵一嶂起茶煙深
竇源通海層岩樹隱天攜琴就猿鶴同種玉峰田

湖上

東山志匪違幽澗木苗肥野樹翻鴉響岩花撲燕飛湖
晴林岫出水澗渚村微笑謝紅塵客休過阮裕磯

其二

逝水不窮流滄江汎小舟沙喧飢蟹出波湧異魚遊日
月雙輪駛山河一塊浮扣舷歌李白采藥向荒丘

其三

倦寢獨披襟閒庭愛月臨移牀避花露開戶納槐陰鳥

度湖天濶猿啼澗靄深蒼茫對雲野隱隱數村砧

香奩

湖水蕩難平儂愁向晚增短蓬徒欲剪浮行不堪憑舊
織蒲萄錦新裁芍藥綾持針忘引線縫就已炎蒸

雜詩

鳳凰遊北極金風襲郊局衆穢俱零落芳草亦不生徘徊
幽巖中但見松枝青托根未得所歎息此孤英

其二

鳳雛不能翔鴻鵠自高舉遺身中林間羞與衆鳥侶羽
翼諒未成不復思故宇惜哉無知音驚鷄難與語

其三

宋宣舍與夷魯定遠務人淳龐自可貴菲薄不足珍悲
哉三季後公道遂隱淪傾奪焉知恥遜讓誰復循

月色菊

自種堯年經幾秋嬋娟素影露香浮玉顏空有嫦娥貌
鍾尉歸時已白頭

雙星菊

雕闌並蒂結秋期
豈恨繁華歲暮時
不似碧霄長契濶
銀河望斷遠相思

紫毬菊

一團秋色幻朝霞
搖曳欄干疊綺羅
十對紅粧應罷蹴
柴桑興比晉昌多

瑪瑙菊

露飄瑤液灑西風
麟脯秋深貯已空
自是瑤池會中物

不堪埋沒萸園叢

鷺翎菊

浴罷山陰舊墨池
斷翎如雪點寒枝
月明還戀秋原草
清影襯映曲籬

臘脂菊

一簇櫻唇綴晚條
每逢搖落倍妖嬈
露寒易灑潯陽淚
況是龍山恨未消

萬藥菊

晉代宮娥數十千
潯陽江上逐樓船
自從靈寶揚塵後
都上荒籬野徑煙

白牡丹菊

東籬誰識舊花王
自別唐宮處處霜
猶似沈香亭北見
美人凝睡倚新粧

題桃花喜鵲畫

天台山下客來稀
洞底春芳映晚暉
雙鵲飛來枝上噪
玉人應訝阮郎歸

題山茶喜鵲

平泉一樹獨先春
枝上靈禽報喜頻
似得玉人南海信
絳房含笑露香唇

木犀畫眉

五嶺秋香接海波
尉陀官廢少人過
枝頭越鳥顰雙黛
怨彼蒼梧夕照多

附張黼諸菊詠

金蓮菊

洛浦歌殘不見人
秋風三徑露香新
天然富貴無雕飾
羞逐齊宮錦襪塵

玉英菊

獨對霜籬坐日曛
秋風三徑思繽紛
瓊樓十二天何處
欲寄瑤華隔暮雲

托葉西施菊

艷質新移自苧羅
獨留亡國恨偏多
秋來何處看遺跡
寂寂無言斂翠蛾

醉楊妃菊

秋園晞露月將高
被面餘酣尚未消
無復三郎重顧笑
艷粧空似海棠嬌

太真菊

千載崑坡起斷魂
黃冠猶帶土塵痕
籬邊笑領金錢賜
正是新承雨露恩

喜容菊

寶臉初勻膩粉輕
含嬌倚態漫多情
相逢一笑西風裏

猶自能傾下蔡城

緋桃菊

登高才罷重徘徊為愛深紅繞徑開
落日餘酣迷處所祇疑誤入武陵來

白牡丹菊

玉露凝輝粉艷新芳魂無意近陽春
只愁野鹿重銜去零落秋香逐路塵

臘脂菊

甘谷仙歸阿母家夜開聊簡試丹砂芳唇麗臉爭春態
不用東風駐歲華

羅益菊

幕幕團陰采采花秋深空倚曲欄斜若為借得東風便
飄逐春雲擁翠華

金錢菊

六宮歡笑破春顏正是君王賜阿環惆悵龍文千載後
却隨秋卉落人間

金絲菊

作鹽抽香半未齊秋來不上玉人機
露寒三徑西風緊
留得團花待白衣

石倉歷代詩選卷三百四十

欽定四庫全書

石倉歷代詩選卷三百四十一

明 曹學佺 編

明詩初集六十一

陳秀民

嘉興人

至京雜詩

秋氣日淒厲百蟲晨夜鳴白露徧野草微霜忽已凝客
子衣袂薄結駕遠遊行俯視離獸奔仰睇孤鴻征宇宙

浩茫茫江河杳冥冥念我同袍子懷憂心煩縈

賦得來蘇舞送朶惟齋監憲浙東

妾本良家子玉顏照明都十三學楚舞十八未嫁夫齊
眉纏錦段全臂絡真珠春風轉羅袖明月墮瓊琚一舞
舞渾脫再舞舞來蘇為君千萬舞託君以賤軀

灤陽道中雜興

晨出建德門暮宿居庸關風鳴何蕭蕭月出何團團短
轅駐空野悲笳生夕寒我本吳越人二年客幽燕幽燕

非我鄉而復適烏桓前登桑乾嶺西望太行山中有九折坂欲往愁險艱役役焉可求吾將返林泉

送彊彥栗歸吳

嗟我吳越人惻惻客燕都凡見鄉里士依依不忍疎況子重信義尤與它人殊寧無情繾綣執手與踟躕薊門秋月白城頭夜啼烏城中良家子半是南征夫或從張都護或屬李輕車道傍別妻子泣下如迸珠自非英雄具孰使禍亂除戎馬暗中國遊子將何趨君歸慰父母

繫我獨何如

燕京客舍送友歸天台

雁鳴沙漠風秋入燕陵樹客子衣裳單寧不畏霜露驅
車國東門迢迢懷往路尺璧橫道周誰能一回顧登山
豺虎雄入海鯨鯢怒天台隔三江丹霞夾玄霧黃精或
可尋胡麻庶當遇明時有遺佚歸哉保貞素我馬病已
久東西厭馳騖驚逸駕如可攀吾將執其御

謁賈傅廟

昔讀治安策今謁太傅祠骨鯁有如此英靈或在茲弔
原寧無感賦鵬終有疑直士多放斥佞人每高馳漢文
稱令主逆耳猶見遺如逢昏與暴殺人固其宜湘江有
流藻可以薦明染褰帟拜遺像流涕滿衣裳

題王長史所畫天平龍門圖

月黑山鬼號蒼龍鬬折角仙人一掌擎不令墮深壑秋
高勢峻層日暮氣慘錯闌干冰柱懸凌亂雪花落路狹
僅通人峰寒不棲鶴王侯天機峻躋攀故盤礴寫作龍

門圖奇氣低五嶽神魚息天池有待風雷作

壬午九月九日與郭希仲紀叔維馬希遠飲周
景父晚香堂上紀畫墨菊馬鼓琴既而各賦

一首

去年登堂三月三主人置酒澆春衫今年登堂九月九
堂上主人復多酒馬生彈琴紀生畫郭子題詩美如炙
四明狂客醉欲倒菊花插帽秋光好百年節序能幾逢
人生會合何其少人生會少將奈何為君起舞為君歌

歌殘酒盡更須酌莫待他年白髮多

賦得烏夜啼送蘇彥剛奉母歸汴

城頭月白烏夜啼上下擇木不肯棲
昔日養雛今已飛啞啞喚母登好枝
烏啼亦有樹子行得無歸車中孃孃
髮素垂綵旌日向東京馳東京土美桑
棗肥衣食可以無寒飢烏夜啼啼何為
歲將晏矣歸來兮

題幻住菴中峰和尚蓮池野亭小像

亭前池水生蓮花亭中老禪方結跏
雙枝作供淨瓶裏

彷彿玉井銜丹霞世上蓮花亦常有玉堂不比丹青手
水底冰蠶已化龍絕世于今故無偶師是蓮花花是師
亭亭淨植澗不緇胸中五色舌上吐爛漫寫出蓮花詞
世間物物皆為幻我把新圖作真看君不見中峰峰上
十丈蓮吹香夜夜到諸天

題江山萬里圖

曹郎胸中墨數斗筆下煙雲千萬重崑崙積石泰華接
瀟湘雲夢銀河通岷峨翠流三峽水衡岳青蓮五老峰

清溪九曲處，士屋丹霞百丈神仙宮。下有臨淵欲墜之靈石，上有參天不老之長松。嵐光雨氣迷遠近，咫尺萬里將無窮。誰知大地山河境，乃在水鱣意匠中。我今撫卷三歎息，畫史真能奪化工。

鵲喳喳

鵲喳喳，烏嚙嚙。飛語流言滿城郭。日東升，月西落。今日之日已非昨。貴人有病不飲藥，女巫降神歌噩噩。天漫漫，地漠漠。氓之蚩蚩，罔知覺。馬出河，龜出洛。天下文明

聖人作

送遠曲

誰令車有輪去年載客西入秦誰令馬有蹄今年載客
過遼西車輪雙馬蹄四念君獨行無近侍婦人由來不
下堂側身西望涕沾裳恨不化為雙玉璫終日和鳴在
君傍

至武岡

家居猶旅食兒子復南征婁縣千江隔都梁百日行雁

書天外遠馬角夢中生食祿非吾願何時復舊耕

至岳州宿岳陽樓

蕩槩遡流光登樓望八荒江山出圖畫天地入舟航夜
靜星文動秋高月色涼題詩懷李白搔首鬢滄浪

山居雜詠

好山看不盡遊罷更須登石屋晴猶雨天池夏亦冰尋
仙碧霞裏飛步白雲層松花飄滿地歸路喜逢僧

登靈巖

寶殿壓崔嵬華池頂上開山從太白出水自洞庭來閣
樹聯珠塔巖花照石臺吳王清暑地那得有塵埃

懷古和陳惟寅韻

范蠡已霸越功成澹若無扁舟五湖上烏喙不敢呼冥
鴻在寥廓燕雀下萊蕪

兔走要離墳狸啼闔閭墓寶劍生土光銀池浴秋露迢
迢郭西門玉輦迷金步

海門潮不至昱嶺掩空關龍隨白雁去何時復南還蕭

蕭禁中樹盡為樵牧攀

寄題集上人清暉樓

山水含暉翠欲流上人于此結飛樓
高明不比人間住縹渺渾如天上遊
璧月光涵吳苑夜金蓮香引洞庭秋
幾時借得浮丘鶴與爾題詩在上頭

揚州

瓊花觀裏花無比明月樓前月有光
華省不時開飲宴有司排日送官羊
銀牀露冷侵歌扇羅薦風輕襲舞裳

遮莫淮南供給重逢人猶說好維揚

邳州

青山一髮見邳州落日雲迷故國愁父老空傳黃石在
仙人已伴赤松遊乾坤不信無清氣河水胡為尚濁流
野樹昏鴉棲未定數聲哀角起高樓

邳州望古北居庸諸山

古北居庸一望中風沙滿眼亂芙蓉曦車夜轉崑崙脊
華蓋陰移太乙峰金口水流終到海玉泉雲起又隨龍

兩京形勝今如此可擬秦關百二重

湘鄉道中

日暮倦趨山市遠解衣聊復憩巖阿雲迷險道藤穿石
水落懸崖草亂坡木客下時人迹少鷓鴣啼處客愁多
向南言語憑誰辨莫問蠻方事若何

五月九日調軍入綏寧是夜宿風門嶺值雨

五月官軍入不毛重岡複嶺接天高小臣報國寧辭死
大將行兵無乃勞漠漠野煙啼魍魎陰陰山木挂猿猱

二更風雨來關峽自喜挑燈看寶刀

西湖竹枝歌

鴛鴦宛在水中央恰似阿儂初嫁郎
擲却郎君金彈子勸君切莫打鴛鴦

姑蘇竹枝詞

吳門二月柳如眉誰家女兒歌柳枝
歌聲嫋嫋嬌無力恰如楊柳好腰枝

岳陽樓夜宿

湘靈瑟鼓瀟瀟夜龍女笙吹淡淡秋楚曲吳歌互相答
嶺猿巴鳥不勝愁

陳雷

字公聲秀氏之
子有竊菴集

春日懷周葵窗助教

紫燕黃鶯來去飛綠楊煙暖午風微先生倚杖花邊立
童子舞雩川上歸景物自隨幽意得世情渾與此心違
緣知野馬多如許不染春雲白練衣

壽陳曉山富春人號春江漁者

春江漁者詞林客投老棲遲尚異鄉
七里灘頭煙水遠一竿風外釣絲長
赤霄白日飛鸞鵠碧樹丹山集鳳凰
我亦平生愛瀟灑放歌還許濯滄浪

題方氏澄心亭

澄心亭子水之湄結構空涼也自奇
已映渚蒲青間出更涵沙竹翠相宜
寒漿玉露銀牀凍碧甃銅餅紫綆垂
到此不因同靜者湛然方寸與誰知

題楊氏問月軒次周葵窗韻

我欲停杯問廣寒中間宮闕幾時安
丹橋有影非難上
玉斧無痕許借看不信藥成煩老兔
誰憐桂冷濕青鸞
相逢今夕知何夕莫笑清狂興未闌

寄劉仲原經歷

鴛鴦湖水漾晴暉
鏡裏遙峰入望微
槐陰午衙書帙靜
蓮香秋幕吏人稀
青雲步穩名逾重
白石歌長願已違
他日相逢話疇昔
應憐憔悴不勝衣

自城東復向感化舊居留別徐德厚

孤雲無定水悠悠又復攜書返舊丘
橡栗樹空猿叫夜
蒹葭霜冷雁知秋
懶梳白髮頻搔首
笑對青山獨倚樓
暇日清遊可乘興到門題鳳亦風流

寄姻友王近智

夢繞故山歸未得
俱將旅鬢逐年華
煙村白屋留孤樹
野水危橋踏臥槎
倚馬文章真可羨
寄魚音信莫令賒
雄飛總是尋常事
須用窮年讀五車

效唐近體二首奉贄雲門張布政

湖山佳麗有餘暉
台輔星明近紫微
月轉桐陰書帙靜
幕深花影吏人稀
九重浩蕩恩尤渥
萬里扶搖志不違
無計干時空潦倒
却令山鳥怪儒衣

異鄉身世寄飄零
畢娶猶慚向子平
雲外青山他自好
雨中蒼葑若為耕
鹽車困驥思芻秣
涸轍窮鱗待水生
重覓西湖舊遊路
舞堤楊柳不勝情

題徐思敬瑤池小景

縈泉疊石帶煙霞
此景人間有幾家
錦字書傳青鳥使

玉簫聲繞碧桃花雲容窈窕誰能寫月色嬋娟我欲賒
不待扁舟乘興去珊瑚長拂釣竿斜

賦孫德芳雪香齋

淡粧素服出天真彷彿羅浮世外身自與芝蘭同氣味
不須霜月借精神暗熏詩夢春先到光映書帷夜轉新
三嗅悵然成獨詠為憐清絕更無倫

早春寄周致堯

百年身世渾如寄何處他鄉是故鄉柳態正須春弄色

梅花自與雪生香揚雄寂寞玄猶白賀監風流醉亦狂

倘許勝緣同晚歲梨林風致即柴桑

梨林致堯所居之地也

竹所次盛孔昭韻

萬玉森森護草堂八窗虛敞夏生涼清修迥出風塵表
瀟灑駢生水石傍淨掃莓苔聽翠雨閒題詩句洗鉛霜
籜龍更放新梢出相並梧桐宿鳳凰

秋望

西風涼冷氣蕭疎對景誰能寫畫圖紅樹離離變霜色

黃沙渺渺帶煙蕪
嵐消斷壁山容瘦
水盡遙天雁影孤
乞我五湖舟一葉
也應託興為蓴鱸

寄隱者

地隅煙霞絕垢氛
悠悠世事了無聞
漁樵來往頻分席
麋鹿尋常不離羣
花下一樽黃菊露
松間千頃紫芝雲
箕山潁水風流遠
誰謂高情屬隱君

霜

悲角奏梅花江雲冷
萬家不知青女妬
却道棄鉛華

題秋江待渡

遠岸白沙渺渺疎林黃葉離離莫怪行人爭渡村深踏
月歸遲

題畫馬

赭袍烏帽立奚官牽出春風十二閑不屬丹青傳寫妙
龍媒何得至人間

紅梅

姑射仙人下杳冥綃裳環珮玉泠泠香魂誤入羅浮夢

幾度微吟喚得醒

釣魚圖

歌向滄浪獨羨魚
釣竿閒却意何如
磻溪夢裏青山老
猶遇君王載後車

陳景融

號菊逸
雷之子

次飲酒懷古韻答張子英

日月不我與
光陰年復年
不知千載後
孰識千載前
寓懷一杯酒
醉來頽其肩
死生固虛誕
彭殤亦徒然
及時

不勉勵老大悲遷延營營世上人紛紛愚與賢貴賤各
自適出處難同傳浩歌且復飲賦命存乎天

次韻暮春

春風官路馬蹄輕拙宦歸來恨莫平呼酒且判今日醉
看花又動昔年情朋遊老去鷗盟冷世事于今蝶夢驚
取紫拾青男子事便應投筆效班生

雙清圖

玉樹花香壁月圓繡衣深映色清妍窗涵疎影孤山夜

人在澄光萬里天雲母帳虛沈畫角水精簾淨濕冰絃
廣寒高處應難到立徧闌干醉不眠

題雲山圖二首

青山寂無言白雲自舒卷對此淡忘歸何心在軒冕
雲擁青山遠風生碧樹涼悠悠高世士矯首意何長

真長望月圖

羽衣何蹁躚悠悠坐林樾浩歌天地間清風共明月

看雲圖

世態炎涼總不知此心惟與白雲期
千巖萬壑無人迹
慷慨登臨有所思

雲山圖

浮世茫茫自古今紅塵不到白雲深
挂冠神武歸來後
隨意看山憩樹陰

秋江獨釣

雲山萬疊水煙空白鳥飛邊思莫窮
未遇君王後車載
釣絲黃葉共秋風

仙女醉歸圖

碧桃花下宴初還
雲御逍遙擁侍環
兩鬢天風吹不醒
肯教清夢落人間

陳顥

字漢昭景融之子有竹鄰稿

夫子聽琴師襄圖

蒼姬尚文治叔世
生宣尼立教以垂憲
天縱聖哲資師襄
何許人冠裳肅威儀
援琴得高趣揮手調
朱絲悠悠太古音
不藉言與詞松陰白
日永蕭瑟生涼颼
一彈萬

慮息再彈心曠怡樂與二三子聽之忘神疲世遠不可
作此音知者稀撫圖三歎息長吟寄遐思

泣麟圖

詩亡春秋作姬政日就隳麟也本仁獸出焉非所宜夫
子因感傷臨風涕交頤畫史載遺跡千古興嗟咨方今
聖人出端拱致無為豈獨麟瑞世鳳凰亦來儀往事勿
復論作詩頌明時

題侯貳守歸去來辭畫

曠達不世士性本愛丘山一為利祿縻役役簿領間田園已將荒不歸誠厚顏斂裳中宵逝遥遥駕舟還矯首睇孤鴻高舉謝塵樊

其二

捨舟履平陸行李相追隨原野何蕭條晨光亦熹微前途問征夫載欣復載馳吾廬已在眼僮僕候柴扉新歸且慰意奚論昨是非

其三

故廬南山下三逕已就荒
惟存舊松菊蕭蕭歷風霜
入室攜幼穉嬉笑牽衣裳
怡顏盼庭柯寄傲倚南窗
牀頭有旨酒陶然酣一觴

其四

束帶事趨謁素志恒乖違
迷途實未遠遂茲故園歸
榆柳紛掩映蘭菊相因依
俗轍稀往來竟日掩柴扉
復得反自然諒匪造化私

其五

解印歸故園行行循舊蹤扶老藉筇竹流憩挹松風矯
首蹤遐觀湛然天鏡空鳥兔奚逼人飛走西復東丈夫
貴適意疇能困樊籠

其六

天末雲冉冉林端鳥翩翩雲出既為雨鳥飛亦知旋君
子識其微進退合自然靖節曠世高素翁當代賢出處
雖異途德音可同傳

其七

先人手栽樹勢若蛟龍蟠苔蝕鱗甲紫聲號風雨寒別
爾忽已久歸哉此盤桓日入景翳翳撫之欲捨難但願
堅晚節不必封秦官

其八

素志本丘壑榮名非所謀進退適其宜諒不愧前修言
歸柴桑里避喧息交游與世漸相違駕言復焉求取樂
在琴尊不顧身外憂

其九

遊宦去鄉邑誰不念同儕道路阻且修遂俾良晤乖爰
歸得聚首談笑情相諧琴書日在眼撫玩適我懷以茲
消百憂嗒然外形骸

其十

安居謝聲利人人羨其高詩酒得真樂廬舍無喧囂孤
舟出前溪巾車駕東臯淵魚樂洋洋枝鳥鳴交欣然
覽時物天地同逍遙

其十一

不為三徑荒決志亦念歸歸來身我有悟昨事皆非晨
興出門去放跡信杖藜尋壑既窈窕經丘復逶迤於焉
樂吾樂舍此復何之

其十二

微風自東來地脈初回陽好鳥出幽谷潛魚躍芳塘欣
欣木向榮涓涓水流香萬物俱得時吾憂亦已忘歸來
衡門下且復酣杯觴

其十三

人生非金石寓形宇宙間抱才既沾祿知休即辭官委
心隨去留避俗謝往還遑遑欲何之富貴不可干劃然
發長嘯白雲起南山

其十四

農事在東臯孤往適茲旦微雨亦既零土膏濕凝汗僮
奴未盡力宿草猶餘蔓植杖隴晦旁耘耔日過旰勞生
雖多艱卒歲應飽飯

其十五

帝鄉不可期歸老全此身清風謝流俗高節抗浮雲舒
嘯登東臯賦詩臨澗濱有酒輒取醉不負頭上巾樂天
以乘化超然真達人

夢登山

瀛洲信難求天姥或可覩朝談謫仙詩夜夢遊仙塢煙
蘿百尺手自攀飛步直上青雲端瑤草香浮碧煙暖松
風怒作秋濤寒踰千巖兮歷萬壑四顧無人自盤礴羽
衣丹頂雙臯禽戛然長鳴遡寥廓我欲因之縱攀躋空

中恍惚聞天雞豁然驚覺失所在天青月落銀潢低

觀瀑圖

碧落無塵秋氣高白雲捲空如海濤山人避俗事幽討
眼明八極窮秋毫就中匡廬有佳色飛流倒瀉三千尺
初驚白虹飲澗泉又疑玉龍挂巖壁萬里長風吹不收
坐令毛骨寒飈飈漆園傲吏去已遠長庚仙人今在不
我生素志亦丘壑苦因筆硯相纏縛何當卜鄰如此圖
聽水看山一生樂

醉時歌春夜宴周元亮客軒作

香徑無塵雨初歇海棠半謝臘脂雪千年一刻度春宵
愛殺清妍柳梢月苔溪仙客文中英面如玉盤雙眼青
金龜換酒不自酌芳筵羅列邀佳朋座中談笑總超俗
咳唾隨風散珠玉姚郎起舞伍君歌擊鼓催觴令行速
四明客子醉欲顛仰看北斗低青天葛巾吹墮落花裏
玉山倒向東風前人生得意要須樂底用閒愁時作惡
君不見三閭大夫獨醒死留得虛名亦徒爾

絡緯吟

梧桐葉黃風露清
槿花籬落莎雞鳴
花間葉底振雙羽
夜涼何處無秋聲
秋聲嘈嘈斷還續
非絲桐兮復非竹
冰繭春繚檻外車
寒機曉轉窗前軸
貧家少婦魂夢驚
起來搔頭向月明
南鄰北舍悄無語
聽此淒涼淚暗傾
去年養蠶抵作賦
一絲不得添襦袴
破衣無絮過殘冬
兒女啼寒雙肘露
今年二月賣新絲
賣絲得米充腹飢
荒居蕭條生理薄
冬來依舊寒無衣
紅樓女兒好顏色

銀甲彈箏按商拍滿身羅綺倩人扶十指何曾親紡績
秋宵沈沈更漏遲牙牀醉枕珊瑚敲芙蓉花嬌殢春夢
耳邊那暇聽莎雞莎雞年年報秋節豈識人間歡怨別
人間歡怨可奈何一笑長歌醉明月

題商山四皓

羸秦虐斂不可觸衣冠往往逃空谷皤然鬚髮四老翁
高臥商顏謝塵俗炎精奮起天地寬蒲輪就聘來長安
雖云誤落子房計終為高鴻成羽翰羽翰既成大事畢

還踏山中舊行跡松陰滿地生微涼一局枯碁消永日
局終人去今昔非雲山寂寂空猿啼臨風展盡三歎息
一曲共誰歌紫芝

竹鄰子歌

竹鄰子何許人云是落托窮鄉民柴門半掩堪羅雀布
衣百結如懸鶉囊間有錢即沽酒甌中無米從生塵讀
書不多慮事淺發言往往遭衆嗔獨行獨止無與友拂
石醉臥蒼厓根忽夢數君子玉立而長身口云出自渭

川族托跡今居漢水濱
冰霜風雨不改色
梅仙髯史吾同倫
聞君失意衆所棄
吾獨愛之求與鄰
但多釀酒對君飲
日日清風掃戶新

題竹

湘江玉一枝
風節清如許
掃榻致秋陰
鷓鴣啼暮雨
直節從來瘦
虛心本自清
涼風屋頭起
葉葉是秋聲

題扇送友人

嫩人久不見
此地偶相過
復送扁舟去
其如別思何
草

香汀雨濕花暝樹煙多後夜蘇臺上誰同一醉歌

次韻答張道士

見說辭京國端居又一年詩瓢寒掛月丹竈煖生煙謝
俗怡清淡探玄論白堅何時造林下煮茗試山泉

早春言懷寄友

十日九風雨吟邊無好春懷人望南浦借酒問西鄰野
性陶潛懶交情鮑叔真幾時連榻話一洗寸心塵

題畫扇次岑琬韻

自適閒邊趣誰言分外求
看山一瓢酒載月五湖舟
秋水清吟思西風冷釣裘
惟應陸甫里千古可同流

雲軒為月上人賦

高僧忘世相縛屋就雲深
靜看千峰白幽棲半榻陰
卷舒雖有態去住本無心
我亦求閒者何時一訪尋

春隴耕雲

耕業依先隴遺安屬隱君
綠疇三寸雨黃犢一犁雲
草際春陰合花邊曉色分
鹿門有高士端可與同羣

寒潭釣雪

歲晏風兼雪扁舟駐釣灘
瑤花半蓬濕柳絮一簑寒
子厚偏攻咏玄真苦避官
如何渭濱叟頭白謝漁竿

松室調琴

一室大如斗牀留三尺琴
蒼松存古操靈籟發遺音
鶴語驚秋冷烏啼覺夜深
惟應貞白叟會取伯牙心

壬申正月晦日夜夢至僧舍遇一老叟云欲于
靜處少休予應之曰借來雲半榻睡起日三

竿覺而枕上足成

漸老疎塵事心清身亦安
借來雲半榻睡起日三竿
松火爐頭煖風波屋外寒
行藏皆夢裏何必問邯鄲

滴翠峰

一峰高竦秀不與衆峰鄰
翠滴虛嵐曉青含太古春
祥煙生几席爽氣逼衣巾
絕頂誰能上巍然隔世氛

涵碧池

鑿地為方沼層巒四面圍
天光涵古鏡苔色上春衣
幽

鳥情相契閒雲影倒飛誰安一拳石比作釣魚磯

彩虹橋

壘石為梁柱憑誰號彩虹煙雲遮不斷霄漢步應通澗
草寒留碧山花暖襯紅此中豪邁氣不愧茂陵翁

丹霞洞

路從林谷轉門向石巖開晴色薰瑤草丹光映碧苔固
應無鎖鑰疑別有樓臺欲扣長生訣仙翁跨鶴來

紫芝徑

萬壑千巖裏幽深一徑通紫芝生奕奕香霧濕濛濛托
隱商顏迹遺芳謝氏風肯容閒客採短策擬相從

蒼松塢

一簇煙霞島週遭盡植松蓬萊元不遠弱水自應通翠
滴林梢露寒生石罅風茯苓如可斲早晚約仙翁

臥雲巖

翠巖雲借宿與客共閒心石榻春生暖蘿房晝作陰氤
氲飄素練窈窕窈窕接青林那得長留臥蒼生望雨霖

流香澗

泉脈來何許，縈迴下曲塘。
雨過平漲綠，花落暗流香。
石面凝春暖，松根漱晚涼。
高歌濯纓客，何必問滄浪。

題友雲水墨畫以唐人不雨山長潤無雲水自陰為畫景遂次其韻題之

看畫晴窗裏，蕭然淨俗心。
鳥聲春寂寂，嵐氣晝陰陰。
門俯滄洲迥，船移別浦深。
令人想風致，飛夢到雲林。

雨中寫懷

草徑通村入茆茨傍水安貧知身計拙瘦覺帶圍寬花
雨沾苔濕茶煙入竹寒無人會心事默坐自彈冠

睡起偶成

晝長幽禽驚夢醒起向松窗汲寒井隔竹惟聞犬吠聲
竹深似見人行影我貧無力種山田多病翻成半月眠
莫是相憐來訪者舊券從添賒酒錢

春日寫懷

東風吹雨著輕塵芳草茸茸濕翠茵寒食過來猶自冷

海棠開後不多春山中謾憶陶弘景谷口誰尋鄭子真
聖代只今同化育滄溟不信有窮鱗

夜宿大雲寺留題竹深處

日暮尋幽到竹深竹煙晴鎖寺門陰苔荒路絕行人迹
月出潭空靜者心清供一盂香積飯閒情半榻白雲衾
留詩已與青山約莫厭頻來訪道林

冬日客懷

江國冬來十日陰閉門高臥擁寒衾貧將乞米無顏帖

客久思家有越吟雪壓荒橋行路斷山藏老樹凍雲深
百壺安得如澠酒細與梅花說舊心

暮春遣興

柴門地僻懶衣巾閒看行雲到水濱花片流香通曲澗
樹陰分綠護山鄰蘇張謾騁縱橫街巢許甘為隱逸民
獨立斜陽思無限不知何處是通津

謝朱士章惠墨

錦囊封墨到山居知是蓬萊貢獻餘雲氣曉寒生筆硯

松膠價重抵璫璵山人借錄歸田藁野叟分抄種樹書
珍重交情無以報寸緘聊為寄雙魚

晚過閭門望虎丘作

平生未識虎丘山此日經過不暇攀泉石佳期隨處有
古今清賞幾人間樓臺影落春雲外鐘鼓聲來夕照間
獨倚帆檣遙注目客懷空羨鶴飛還

哭中表弟張秉

十年辛苦事遺編抱病那知竟不痊黃土一坯今古恨

青山半世弟兄緣
草堂春去思無夢
竹屋雲深榻自懸
莫話少年平昔語
夜深風雨到燈前

和答鑑中上人

聞說高居似道林
俗流無地得相尋
菩提子落空巖靜
優鉢花開古徑深
身外利名忘得失
眼中烏兔任升沈
遙知一榻跏趺處
勘破西來佛祖心

宿吳江泗洲寺值主僧不在留題

客舟來泊古招提
落日吳江望欲迷
茆屋幾家村遠近

野橋危木水東西
茶煙暝護蘿房榻
花雨香沾石磴泥
不遇高僧誰共語
新詩謾向壁間題

遊海虞城中

琴川風物舊如何
此日乘閒試一過
海邑官清無獄訟
土城風古有絃歌
言公井畔蒼梧老
虞仲山前白石多
謝此高僧留我宿
暝隨猿鳥入煙蘿

泊吳江塔寺主僧留飯

塔寺東南湖水長
三高亭下晚風涼
鯉魚出沒楊花白

鷗鳥浮沈杜若香
僧喜詩人留共語
商隨漁叟泊連檣
丁寧黃帽休貪懶
早理征帆候曙光

新秋次韻

江涵秋影雁南過
涼思催人可奈何
林下久知塵事少
水邊惟愛月明多
吳鄉鱸美應分膾
楚客衣單自製荷
回首滄浪濯纓處
高情慚愧釣魚蓑

漢宮秋

漢宮移植近庭隅
粧點秋容錦不如
羅扇涼生螢歇後

金莖露滴雁來初
昭陽宿酒酣飛燕
長信秋風老婕妤
零落當時守宮血
清霜幾度為消除

登雲曉望

十丈金鰲白玉闌
偶來乘興一躋攀
月沈蕭寺煙鐘外
日出滄洲水樹間
野鳥無聲隨客去
海風隨陣打潮還
回頭却羨雲菴叟
掃地焚香獨自閒

妙峰夕霽

長廊鐘磬寂無聲
簾捲西風看晚晴
池色倒涵天鏡碧

霞光斜照佛龕明扣禪客去雲留宿乞米僧歸鶴出迎
却憶舊來分榻夜臥聽簷雨滴三更

寒夜聽雨寫懷

風聲雜雨夜瀟瀟倦枕昏燈夢寐勞報國丹心徒自許
欺人華髮不相拋池塘春草無新句籬落寒花只舊交
起看牀頭三尺劍尚餘豪氣拂雲梢

竹深處次韻

誅茆竹裏似巖棲面面窗開翠色迷長聽雨來虛榻外

安知日轉畫欄西
奚僮掃地收新箨
吟客敲門看舊題
我欲相尋無路入
鷓鴣何處隔煙啼

鴻門宴

兩雄秋色與南山
決計鴻門一會間
醺醖徒能澆虎士
干將那得犯龍顏
雪飛雙斗尊前失
天護單車灞上還
明日咸陽風物改
有人衣繡憶鄉關

踏車婦

破裘風颺足移頻
長夏隨夫歷苦辛
那似美人梳洗罷

一鉤羅襪步香塵

聞鄰家機聲

竹裏人家笑語稀
日長少婦學鳴機
橐砧應是歸來早
二月催裁白苧衣

夜聞鄰童讀書

風送吾伊隔竹聲
鄰童應解對韓檠
我懷髻髮從師日
翻笑于今學未成

新寒望授衣不至

霜露園林木葉稀客邊望斷寄來衣遙知慈母憐兒冷
織盡寒更未下機

立春

蕭條書劍客邊身望望歸期過立春官柳漸黃梅已白
東風應笑未歸人

夜坐

寒來塵緒不關情吟對青燈過二更落葉滿庭風滿樹
小窗無處著秋聲

病中友人見訪

別來南北寸心懸
到得相逢二豎纏
欲典春衣沽酒共
不禁顚顚向人前

秋蝶

粉褪香消力漸微
多情猶自舞斜暉
野花籬落西風冷
不比春園得意飛

秋螢

寒光一點映松蘿
零落西風恨更多
莫向波間照秋影

滿溪涼雨顫殘荷

贈琵琶老妓

玉容憔悴減風流
猶抱琵琶半掩羞
莫向湓城尋舊迹
荻花楓葉不勝愁

秋山行李圖

千山落葉萬山雲
行到荒橋日已昏
羨殺田家頭白叟
半生足不離柴門

漁舟夜歸圖

罷釣歸來月未明
隔離遙見一燈青
不知潮落江風轉
流却扁舟過別汀

太白醉歸圖

偶向長安醉市沽
春風十里倩人扶
金鑾殿上文章客
不減高陽舊酒徒

題畫

漁網中流撒暝煙
江空雁叫雪晴天
錦鱗若得歸須早
莫待風濤暮打船

題梅次韻

孤根自是不凡材，却傍山村野水開。
歷盡歲寒冰雪苦，百花頭上領春來。

五馬圖

校獵歸來卸錦鞍，長林豐草夕陽間。
龍媒不受鹽車困，盡屬皇家十二閑。

剪菊圖

西風三逕近秋期，閒看山童理菊枝。
浪蘂浮花都剪却。

剛留幾朵傲霜姿

題畫

懶向秋風把釣竿
一瓢長醉水雲間
無情白鳥還飛去
不及青山伴我閒

屈原漁父問答

衆醉陶陶我獨醒
此心于世已忘情
老翁不識孤臣意
謾向滄浪歌濯纓

春日閒行

睡起閒窗日影斜
欲尋幽處一烹茶
芒鞋踏徧前村路
楊柳春風有幾家

夜聞雨雪

坐閱殘書夕未眠
危簷雨雪一燈前
不如呼酒陶然醉
免滴春愁到耳邊

月下海棠為姚會川題

酡顏半醉殢春嬌
拂袖東風暖霧消
十二欄杆月如畫
紗籠銀燭不須燒

題白頭翁

老我年來兩髻秋半因詩債半閒愁不知山鳥緣何事
也向西風歎白頭



石倉歷代詩選卷三百四十一

欽定四庫全書

集部

石倉歷代詩選卷三百四十五至

詳校官庶吉士龍廷槐

侍讀臣孫球覆勘

總校官進士臣朱

鈐

校對官中書臣田尹衡

謄錄監生臣熊敦義

欽定四庫全書

石倉歷代詩選卷三百四十二

明 曹學佺 編

明詩初集六十二

高壁

字貴明
山陰人

擬鼓吹饒歌曲

維大明

元世失政太祖兵起淮泗遂定金陵開王業

維大明廣且赫元之末治道失黜忠良陟讒忒人心潰
國運革皇之明秉乾德大老歸羣賢翼修五兵簡百職
靖寇攘拯墊溺命既崇正宸極孚兆民兆民懌表萬邦
萬邦式文德隆武功飭肇洪緒著丕績於萬年垂無斁

江漢平

偽漢陳友諒雄據荆江擁衆東侵太祖親督諸將
大破之于鄱陽湖乘勝拓地至于漢沔

江漢平王業闢以仁易僭順制逆修金湯整戎革俟厥

休命慎乃德允弗度義恃已力驅厥貔虎蹂疆場其旅
如林勢莫格嗟我王民懷戰惕皇克武怒惟赫揮賁育
禦蚩跼雷霆震山石折天日為黃湖水赤僕姑一發摧
大敵大敵摧荆門開昭神功時偉哉

吳水茫

既克荆江旋師淮浙大將軍徐達擒偽吳張士
誠以獻

吳水茫吳山蒼次星紀耀櫓檣蠢彼淮夷據是封疆率

介鱗漁池潢翳桂蒲恣跳梁炳燭火抗太陽封培塿齊
嵩岡帝德廣運不可量指揮叱咤風雲翔著靈威耀靈
光執縛蛟鱷如馳羊弭兵戎定紀綱神武聿興僭偽亡
孽蛟奔

淮浙底平海寇方谷珍惕息竄于海島命將湯和
征之谷珍降

孽蛟奔溟濤興盲風煽毒霧蒸赤城黯慘天姥傾真龍
咨震雷霆截饒牙扼毒吮驅逐鱗介出杳冥天吳稽首

海水寧

閩山高

明既受命陳友定猶據七閩王師自海道伐之友
定就擒

閩山高障炎方負牛斗奠少陽雄斯據之恃險以自強
逞殘虐恣披猖皇行天誅神武揚神武揚渠魁獲醜虜
降霸圖滅跡皇道昌

二豎窮

張良弼李思齊共據關隴大兵攻之良弼遁思齊迎降

二豎窮居膏肓斲元氣為災殃踵徐奄扶殘商國有醫術孔良運金劑開晦盲左顧却右顧降神功顯懿德章躋壽域均樂康

王師樂

大明兵下中原北入幽燕元君走死追襲于應昌元錄既訖天下大定

王師爍孰敢樓踰淮北伐風雷行廓河濟清岱恒震揚
威武隆義聲家室慶壺漿迎獨夫走死元社傾師行豈
惟事戰征弔伐實順民之情至德隣湯武區區漢唐何
足稱

崔之微

將軍常遇春破伊蘓于永平追至遼左以廓
東土

崔之微曹無知大厦已焚爾獨竄身匿藩籬鳴嘯嘯侶

懷南飛詎知宜尉當路歧摧爾翼斃爾軀覆巢殃卵無
復遺雀既亡土宇綏海鵲來貢車四夷

尾維獸

元之遺子保據雲南王師自蜀道進討遂拓
南夷

尾維獸狽而獐不解脫主難而乃為妖白晝鳴據坤維
吐欃槍搖蕩六詔連蜀城皇振旅赫斯征羆虎吼犀兕
騰金戈一指遁爾形遁爾形氛祲清祥麟來遊天馬呈

威德布仁澤行百蠻五竺咸來庭千秋萬歲歌隆平

劍門開

偽夏明王珍保有巴蜀子昇復恃險不庭將軍
沐英伐取之

劍門開蜀山崇稽古王國自蠶叢有物蜿蜒曠誅戮生
子長復為世雄盤巴岷據羌戎吐毒霧煽腥風枯草木
啖豸蟲罪盈惡積聞上穹帝哀殘虐怒匪容奉天行誅
命元戎獲大憝降羣兇山川効順鬼神奏功景龍高飛

乾隆

宣重光

太宗入靖內難紹登寶位南北平定屢著禎祥
國用是治

宣重光燭厚土一聖作萬物覩主百神神錫祐撫萬民
民按堵清內難禦外侮戮蚩尤滅有扈神獸遊儀鳳舞
黃河清甘澤下斯道隆厥施普闡孝文昭神武四海仰
休明垂輝煥千古

文之平

安南黎季犛賊篡其主太宗命征夷將軍跨海
伐之

文之陽極炎荒俗孔陋穢德彰擅弑逆瀆綱常天監明
義旗楊跨險阻越莽蒼斯惡集戮貪狼弔流離哀死喪
律度同恩澤滂布堯德囿蠻邦大哉功業孰與京

抱甕哇

種蔬南國中日出朝露晞抱甕既灌溉荷鋤復來茲于

時用力勤未信成功稀
桔槔豈不便陋彼心有機賢哉
漢陰叟高躅良可希

荷鋤徑

晨興荷鋤出種豆
南山隅徑草一何多
豆苗一何疎
勉力事芟艾
草盡苗漸敷
日入始言旋
疇能慰勤劬
勤劬不足慰
食力心自舒

送沈時霖之京

羽族無大小各稟造化生
鷗鵬何壯哉變化通神明
鴈

鶴雖云微啾啾亦飛鳴願欲一輕附翱翔入雲程徘徊
不可得引領徒傷情

東照軒為暉上人賦

夜宿靈鷲峰元景何漫漫晨旭忽東升光輝麗霄漢離
離品物分灝灝氣象判嗟予昧塵網適此覩昭煥兀坐
啟重關因之達心觀

賦得秦望朝霞送友人

秦王遊幸地雪焰凌蒼蒼夫何變霞氣燦燦輝朝陽郁

然成五彩恍如雲錦章我欲裁為帔復道宜作觴持以
贈美人聊用慰離傷

冬至偶成

羣陰既已極玄景逝駸駸一陽倏已復始見天地心運
行有代謝方位乃在壬羣草圻勾芒黃鐘動希音登臺
望雲氣遠近無氛祲於焉閉關坐感之意沈吟

賦得蓬萊山送貢士胡顯仁之京

少負廓落志俯仰隘八紘長懷列禦寇萬里凌風行一

朝飄然謝塵鞅便覓扁舟成獨往不向桃源探隱踪直
上蓬萊事仙賞蓬萊秀出滄海東三山並列青芙蓉天
開樓閣金銀湧地隔塵凡紫翠重仙姝玉女何佳麗一
笑相逢通密意寶笈因傳却老方玉函覩較參同契閒
來邀我上瑤臺蟠桃正熟高宴開鸞弦吹月周王醉鶴
馭乘雲阿母來神靈變化那能測海色俄驚煙漲黑深
林日落泣山精古洞風寒啼木客此時驚悸却西還回
首仙山杳靄間望中恍覺飛旌蓋夢裏猶聞響珮環傳

書況被青禽悞花發瀛洲知幾度郭璞詩成悵獨吟雙
成別後難重遇正擬尋真續舊盟聞君鍊丹今已成手
攜玄文三萬軸會須拂袖朝玉京相從却恨無由得遙
矚非煙空歎息緘詩煩報會中仙謂我重期鍊精魄

雜詩

璞玉藏深山光彩亦離離豈惟別燕石草木皆華滋下
和久不至銜價當何為所貴蓬室士韜晦以俟時

又

務光辭萬乘魯連却千金外物雖云美豈移君子心所
以千載上令名猶至今奈何刀錐子逐利方駸駸感此
良有為高歌考槃吟

秋日逆旅送友人

七澤波濤險三邊道路窮同悲跡類梗獨咏首如蓬晚
色平蕪外秋聲落木中毋將衰颯淚臨別灑西風

送張都閫征南交

遠夷跳鼠穴上將下鸞坡鼓角臨邊壯樓船出海多宣

恩覃雨露効績統山河麟閣題名日毋慚馬伏波

登越王臺

平生思覽勝今日上高臺衆水分吳入羣山向楚來皇
風時屢降伯業日悠哉撫事增惆悵孤懷鬱未開

寫懷

北上非無策東征漫有歌鳳媒芳信少鴛耦薄情多自
信心長赤誰憐鬢已皤君平不可問吾道竟如何

望行人

憶昔河梁別言歸已有期如何出戶望祇是到家遲汀
草無窮恨江流不盡思空勞長夜夢千里遠相隨

塞上曲

應募早從軍于今白髮新關河書到少鄉國夢歸頻散
牧隨邊校屯耕雜遠人何當按長劍一嘯淨風塵

寒夜吟

綺窗達曙流金波龍盤煖爇香雲和流霞滿酌朱顏酡
雪膚暗熏蘭麝多鳳笙宛轉迴清歌相思掩淚攢翠蛾

夫君不來奈樂何

讀文丞相傳

北騎長驅逼禁宸龍舟入海竟沈淪徒聞諸葛扶炎漢
不見張良滅暴秦誓死願為南渡鬼偷生肯作北廷臣
千年正氣消難盡化作祥雲麗紫旻

寄陳維禎高隱

壯志凌雲思湧瀾清時何事久盤桓終期西蜀興諸葛
未許東山老謝安鴻寶有書徒自秘塵冠無意向人彈

不才我亦成疎散萬頃滄波一釣竿

獲麟歌

麟之興兮可以知道之升兮麟之喪兮可以知道之降
兮嗟嗟麟兮可奈何嗟嗟道兮可奈何

神鳳歌

虞周在世兮燦德輝鳳鳥來儀兮斯其時虞周沒世兮
文德衰鳳鳥高翔兮曷何之寥寥曠代兮臬于飛我懷
古昔兮心傷悲

東征歌二章

隋之荒兮運其亡兮我心傷兮我謀臧兮陳之告之冀
復昌兮

蔽兮幪兮不我從兮我車東兮復誰宗兮舍兼善而獨
善道斯窮兮

鳳笙曲

瑤笙鼓動十二簧嬌音細語咽紫凰迎歌度舞按宮商
按宮商舞鸞鶴進瓊觴奉君樂

遊女曲

珠珮銀鐙艷綺羅
秦中洛下長經過
度曲過雲顰翠蛾
顰翠蛾情默默
樂未央歸何得

春江曲

春草綠滿浦
春波綠滿洲
停橈遙望處
總是別離愁

江行

熊羆無吉兆
鷗鷺有幽期
日暮滄江上
辜芳欲寄誰

浦口別友人

遊倦偶思歸臨歸重延佇一片別離心長逐潮來去

雨窗即事

春色雨中消飛花亂如霰坐久不成吟開簾放雙燕

雲林書屋

漠漠山中雲藹藹雲中樹不聞弦誦聲那知有人住

野田

野田連郡郭春盡未曾耕何事窮邊地年年說戰爭

鳳翥原

不向岐山鳴却化原上土靈氣未能消聞韶欲飛舞

題畫竹

極目蒼梧遠傷心泣二娥試看枝上露不及淚痕多

春草宮懷古

宮花已寂寞宮柳亦凋零惟有宮前草春來依舊青

長信草

青青長信草牆下帶愁生若近昭陵地應沾雨露榮

香奩

芳洲拾翠回院落鞦韆靜小犬不驚人閉階卧花影

樗浦道中逢鄉人

寥寥客途中忽遇同鄉友借問北窗前萱花無恙否

昭君曲

奉詔事和親從容出禁宸緣知平國難猶勝奉君身

題宋高廟墨蹟後

萬里龍沙信不通江頭虛築上皇宮中興謀略無心定
較得臨池筆法工

古宮辭

月明何處度
鑾輿靜掩長門
默坐餘須信
君恩不重顧
黃金無用買相如

來去羊車無定期
纔承恩寵又愁思
仙人掌上芙蓉露
一滴今宵却賜誰

白蓮

湘妃浴罷水晶宮
消盡殘粧一面紅
夜久不堪瓊骨冷
縞衣零落卧秋風

碧桃

粉頰凝香骨鏤冰
夜涼和月倚銀屏
瑤池宴罷歸來早
一笑東風酒已醒

春閨曲

曙色朦朧淡月明
玉人香夢遶雲屏
空教枝上閒闌舌
叫斷東風喚不醒

繡茸零落滿香牀
簾幙低迴晝漏長
無限春愁消不得
風吹一夜思沅湘

附高祀

江山萬里圖

元氣濕淋漓攢峯萬仞危排空森劍戟獵霧動旌旗迴
與星辰逼幽通雨露滋岷峨相控帶衡嶽共崔巍雲暗
蒼梧夕煙霾夢澤時猿聲聞斷續雁影度參差飛瀑凌
三峽層巒隔九疑日邊窺鳥道天際引龍羣斑竹湘娥
淚青蘋屈子悲花香武陵路草色漢陽陂閣險依巖石
橋危拂樹枝仙踪殊宵渺旅思共淒其峭壁臨江斷洪

流赴海遲揚帆方利涉策馬欲何之分野全歸楚民居
半雜夷嶂迴青作畫溪轉綠分支拔地瓊崖折懸虹玉
澗垂幽探窮物象凝睇豁襟期倏忽神靈異崩騰虎豹
馳洞寒啼木客谷靜隱山魃浩興毫端發雄圖掌上披
勝遊嗟未遂展玩起遐思

高廩

字居豐
山陰人

英雄樂曲

晉陽曜靈武江淮環甲兵徂窮虎牢靜龍奮鯨沛清九

功奏天策七德歌延英王會有常宴囚歸無濫刑窮髮
盡編戶端冕咸登瀛三鑑已曾保十漸猶復懲何如惟
薄累千載慚辰羸

黃驄疊曲

騄駼已無種馭馭空有名晉陽興日角忽報神駒生始
識黃驄驃乃是蒼龍精雄姿自無敵逸氣誰敢撓一鞭
追電疾四足翔風輕朝離鄴城寨暮至成臯營突圍虜
心顫薄陳肝膽驚纔獻武牢捷又肅朝鮮征寒暑苦勞

頓道路愁凌兢力疲尚衛轂目瞑猶駢衡論功未受賞
念德殊傷情徹惟瘞安市圖形揭昭陵嗟哉捐軀士白
骨徒填坑

千秋節

虹渚符王瑞龍池叶聖期千秋頒令節百辟侈多儀虎
拜陳金鏡鳧趨上玉卮肯矜民重斂惟喜社新移道濟
慚清議安陽愧諛辭何如貞觀日罔極愈興悲

唐宮行

錦飄影沒江淮水綺羅散盡迷樓燬九土翻為麋鹿場
羣黎盡充蛇虺餌天命真人起晉陽義旗高舉風翱翔
芟夷暴亂成大業驅策豪俊羅賢良誓欲修文長偃武
七德休陳九功舞讜言叔達豈阿從善諫玄成能媚嫵
君臣勸力致雍熙宵旰忘勞親萬幾何期一鑑俄驚失
太白晝見妖氛迷北晨塵聚乾綱毀天樞崇崇照銅匱
一曲方歌斌媚娘四海無從聽桃李開元踐祚內難清
羌氏戎種咸來庭勤政樓開花萼啟燕寢常同第與兄

一朝寵洽傾城色內庭笑看金錢擲春心流蕩不自禁
重賜錦纏娛號國漁陽萬騎搖腥風鼓輦動地旌旗紅
竄身始悟胡兒叛灑淚空懷子壽忠嗣皇乘危御宸極
劔閣青騾望中隔邊烽未息九廟墟木雞忍從良娣奕
後來繼體多昏冥羣奸竊柄何縱橫天門壅隔深萬里
銷兵假瑞誣昇平長垣盜起如蠭午回首宮垣塞蒿莽
紆干凍雀歎無棲仙李春風竟誰主從知世運有推移
危亡殄滅良足悲姬周德澤殊深遠亦有詞人詠黍離

題趙飛燕姊妹凝粧圖

漢家炎祚日已微
白蛾蔽野黃霧飛
長楊獵罷得飛燕
歡然攜手同車歸
龍顏再顧增媚嫵
椒房賜與妃嬪伍
恩澤新霑樂事多
忘却陽阿學歌舞
自恃身輕嬌欲飛
避風臺擁芙蓉旂
齊紈遂起班姬怨
禍水未悟方成譏
春回太液花如繡
一曲歸風楊翠袖
力持不許作飛仙
襮積湘裙留淺縐
餘情貪戀溫柔鄉
木門那省搖倉踉
薄眉澹掃遠山黛
卷髮光凝沈水香
姊妹黃緣欣有托

肯信秋風遞衰落劉輔陳言論鬼神淳于藉寵封侯爵
畫史誰知傾國妖重將粉繪圖生綃潸然莫訝樊通德
千古猶傳啄矢謠

遊靈峰寺

珠林迴象界寶閣俯重城佛境由來靜塵心到此清山
光連野碧湖影蕩空明不見談玄客閒雲自送迎

感寓

木直先遇伐井甘易成乾滿盈天所虧沈冥道自安衆

理固無異多材信有患悠悠閒居子感此興長歎

霧樓山房

白石清泉愜隱心霧樓重鎖草堂深雲連苔徑晴猶潤
日上松坡晝自陰采藥人迷甕鶴引探花客至聽鶯吟
相過幾欲窺文豹只恐幽蹤不易尋

悼黃宗讓

舊同遊處偶重經隣遂淒涼不忍聽化鶴有魂歸海月
層霄無象麗文星春風花墅閒棋局夜雨芸窗冷硯屏

腸斷筆峰埋玉處年來宿草又青青

夜半樂

孝和不記房陵辱羸豕仍容乎踣躅盡疑日晏駕宮車
玉食誰知潛進毒遑遑別駕潞州歸斬關夜入清宮闈
當朝一曲承天樂餘音掃却桑條韋

鳥歌萬歲樂

春風仙李多憔悴深秋却進梨花瑞則天樓啟紫宸寒
釀甕冤魂愁骨醉無端野鳥忽飛來獨占天樞垂兩翅

幾回聽罷北雞晨漫學萬人呼萬歲

衛公載鶴

懿公好鶴終成癖出載華軒居祿食夢穩無聞警露音
身榮忘展沖霄翼九轉還丹雖有期忍令國散民心離
禽荒已自違明訓歸咎徒傷賦載馳

明皇舞馬

龍駒被繡縈金絡勅送梨園聽新樂逸羣獻壽獨承恩
錦韉戲舞銜杯樂不識乘驂與服襄歸閑飽飫龍芻香

誰知曾取胡雛悅却逐羶塵向洛陽

文君當壚

琴心輕撥蘭心動雉鳴求牡鳳求鳳衾裯抱却獨宵弇
厭浥寧嫵行露重當壚釀得醪醕春臨邛爭覩如花人
可憐滌器多才客從此忘歌野有麇

陶母剪髮

剪聲落指青絲斷綰成雙髻香雲亂持向城東易酒肴
市人論直輕千貫為子延賓固有方親枝不惜殊堪傷

此時醉飽孝廉客那識茅容蔬菜香

石倉歷代詩選卷三百四十二